

“АЖИЛЛАГААНЫ УДИРДЛАГА, ЗОХИОН БАЙГУУЛАЛТЫН ЖУРАМ”-ЫН ТӨСЛИЙН ТАНИЛЦУУЛГА

2025.02.27

Онцгой байдлын ерөнхий газрын даргын 2024 оны А/147 дугаар тушаалаар “Шуурхай ажиллагаа зохион байгуулах журам”-ыг шинэчлэн баталсан бөгөөд уг тушаалаар

- 2008 оны А/286 -р тушаал “Шуурхай ажиллагааг зохион байгуулах журам”
- 2017 оны А/149-р тушаал “Шуурхай удирдлага, зарлан мэдээллийн төвийн ажиллах журам”
- 2019 оны А/68-р тушаал “Гамшгийн аюулыг зарлан мэдээлэх заавар”
- 2022 оны А/94-р тушаалаар Шуурхай ажиллагааг зохион байгуулах журамд оруулсан нэмэлт өөрчлөлтүүдийг тус тус нэгтгэн боловсруулсан.

Энэхүү “Шуурхай ажиллагаа зохион байгуулах журам”-д ШУЗМТ-ийн үйл ажиллагаа, бэлэн байдлыг хангах, гамшгийн үеийн холбоо зохион байгуулалт, зарлан мэдээлэл хүргэх ажиллагаа зэргийг нарийвчлан тусгаж өгсөн байна.

Мөн онцгой байдлын байгууллага нь болзошгүй гамшиг, аюулт үзэгдэл, ослын үед

- Засгийн газрын 2015 оны 416 дугаар тогтоолоор баталсан “Гамшгийн аюулаас хүн ам, эд хөрөнгө, мал, амьтныг урьдчилан сэргийлэх, аврах, хор уршгийг арилгах, хойшлуулшгүй сэргээн босгох арга хэмжээний төлөвлөгөө”,
- Засгийн газрын 2022 оны мн/375 дугаар тогтоолоор баталсан “Төрийн цэргийн болон хууль сахиулах байгууллагуудын харилцан ажиллах нэгдсэн төлөвлөгөө”,
- Онцгой байдлын ерөнхий газрын даргын 2023 оны мн/19 дүгээр тушаалаар баталсан “Онцгой байдлын байгууллагын чиглэлийн төлөвлөгөө”,
- Засгийн газрын 2023 оны мн/134 дүгээр тушаалаар баталсан “Нийтийн эмх замбараагүй байдал үүсэж, онц байдал тогтоосон үед төрийн цэргийн болон хууль сахиулах байгууллагуудын хэрэгжүүлэх арга хэмжээний нэгдсэн төлөвлөгөө”
- Онцгой байдлын ерөнхий газрын даргын 2022 оны А/350 дугаар тушаалаар батлагдсан “Газар хөдлөлтийн гамшгийн үед Онцгой байдлын ерөнхий газрын ажиллах төлөвлөгөө” зэрэг төлөвлөлтийн бичиг баримтыг удирдлага болгон ажиллаж байна.

Онцгой байдлын ерөнхий газрын даргын 2024 оны А/147 дугаар тушаалаар баталсан “Шуурхай ажиллагаа зохион байгуулах журам”-д тусгагдаагүй зарим зохицуулалт, тухайлбал Онцгой байдлын ерөнхий газрын удирдлага, бүтцийн нэгжүүдийн хариуцах чиг үүрэг, гамшиг ослын төрлөөр хэрэгжүүлэх арга хэмжээний дараалал, гамшиг ослын цар хүрээ, зэрэглэлээс шалтгаалан ажиллагааны удирдлагыг хэрэгжүүлэх зураглал зэрэг зохицуулалтыг тодорхой болгох зорилгоор Онцгой байдлын ерөнхий газрын даргын 2025 оны А/42 дугаар тушаалаар “Шуурхай ажиллагааг зохион байгуулах журам”-д нэмэлт өөрчлөлт оруулах ажлын хэсгийг байгуулсан.

Ажлын хэсгийн хуралдааныг зохион байгуулж, удирдамжийн хүрээнд үндсэн зорилго, хэрэгжүүлэх арга хэмжээг тодорхойлох явцад ажлын хэсгийн гишүүдээс Ажиллагааны удирдлага, зохион байгуулалтыг шинээр журам болгон батлуулах санал гаргасны дагуу “Ажиллагааны удирдлага, зохион байгуулалтын журам”-ын төслийг боловсрууллаа.

Журмын төслийг боловсруулахдаа болзошгүй гамшиг, аюулт үзэгдэл ослын цар хүрээнээс хамаарч ажиллагааг удирдах, шийдвэр гаргах, хэрэгжүүлэх түвшнийг

нарийвчлан тогтоох, бүтцийн нэгжүүдийн хариуцах үүрэг чиглэлийг тодорхой болгох, бусад мөрдөн ажиллаж буй хууль, тогтоомж, эрх зүйн актуудтай нийцтэй байх зарчмыг баримталсан болно.

Түүнчлэн бусад улсын ялангуяа ОХУ-ын иргэний хамгаалалтын байгууллагын мөрдөн ажилладаг ажиллагаа зохион байгуулах зарчим, эрх зүйн зохицуулалт удирдлага бүтцийн нэгжүүдийн чиг үүрэг зэргийг судалж, өөрийн байгууллагын онцлогт тохируулан журамд тусгах чиглэлийг баримталж ажиллалаа.

Энэхүү журмын төслийг дараах бүтэцтэйгээр боловсруулсан. Үүнд:

Нэгдүгээр бүлэг. Нийтлэг үндэслэл

Хоёрдугаар бүлэг. Ажиллагааны удирдлага, зохион байгуулалт

2.1. Гамшиг, аюулт үзэгдэл, ослын мэдээ мэдээллийг хүлээн авах, дамжуулах, удирдлага зохицуулалтаар хангах

Энэ бүлэгт гамшиг ослын мэдээлэл хүлээн авснаас эхлэн нөхцөл байдал, гамшиг, аюулт үзэгдэл, ослын цар хүрээг үнэлэх, мэдээлэл дамжуулах, удирдлагын түвшнийг тогтоох, штаблан ажиллах шийдвэр гаргах зэрэг зохицуулалтыг тусгаж өгсөн.

Гуравдугаар бүлэг. Онцгой байдлын ерөнхий газрын удирдлага, бүтцийн нэгжийн чиг үүрэг

- 3.1. Онцгой байдлын ерөнхий газрын дарга
- 3.2. Тэргүүн дэд дарга бөгөөд штабын дарга
- 3.3. Дэд дарга
- 3.4. Дэд дарга
- 3.5. Улсын онцгой комиссын ажлын алба
- 3.6. Ажиллагааны удирдлагын газар
- 3.7. Гал түймэртэй тэмцэх газар
- 3.8. Холбоо, мэдээллийн технологийн газар
- 3.9. Улсын нөөцийн газар
- 3.10. Санхүү, ар талын газар
- 3.11. Эрсдэлийн удирдлагын газар
- 3.12. Бодлого төлөвлөлтийн газар
- 3.13. Захиргаа, эрхзүй, хүний нөөцийн газар
- 3.14. Гамшгаас хамгаалах сургалтын газар
- 3.15. Хяналт, шинжилгээ үнэлгээний газар
- 3.16. Агаараас эрэн хайх аврах ажиллагаа
- 3.17. Шуурхай удирдлагын ерөнхий зохицуулагч

Энэ бүлэгт гамшиг ослын мэдээлэл хүлээн авснаас эхлэн онцгой байдлын ерөнхий газрын удирдлага, бүтцийн нэгжүүдийн хариуцах чиг үүрэг, хэрэгжүүлэх арга хэмжээг тодорхойлсон.

ДӨРӨВДҮГЭЭР БҮЛЭГ. Хариуцлага

Энэ бүлэгт ажиллагааны явцад буруу шийдвэр гаргах, хүлээсэн чиг үүргээ хэрэгжүүлээгүй тохиолдолд хүлээх хариуцлагыг тусгасан.

ХАВСРАЛТ.

- Ажиллагаа зохион байгуулах дараалал
- Удирдлагын бүдүүвч
- Мэдээлэл солилцох бүдүүвч
- Хөдөлгөөнт удирдлагын байр

Мөн хавсралтаар гамшиг ослын төрөл бүрээр хэрэгжүүлэх арга хэмжээг нарийвчлан тодорхойлох, журмын заалтуудыг тодорхой болгох зорилгоор ажиллагааны удирдлага, мэдээлэл солилцох үйл ажиллагааг бүдүүвч, зураглалыг гаргаж мөн хөдөлгөөнт удирдлагын байрыг ажиллуулах тохиолдолд шаардлагатай техник, хэрэгсэл, тоног төхөөрөмжийн жагсаалтыг оруулсан болно.

Энэхүү журам батлагдснаар гамшиг, аюулт үзэгдэл, ослын үед Онцгой байдлын ерөнхий газрын шуурхай удирдлага, зохицуулалт, бэлэн байдлыг хангах, иргэд олон нийтэд мэдээлэл хүргэх, бүтцийн нэгжүүдийн хариуцах чиг үүрэг тодорхой болж, ажиллагааг шуурхай зохион байгуулах эрх зүйн орчин хангагдана гэж үзэж байна.

АЖИЛЛАГААНЫ УДИРДЛАГЫН ГАЗАР

НЭГДҮГЭЭР БҮЛЭГ. НИЙТЛЭГ ҮНДЭСЛЭЛ**ХОЁРДУГААР БҮЛЭГ. АЖИЛЛАГААНЫ УДИРДЛАГА, ЗОХИОН БАЙГУУЛАЛТ**

2.2. Гамшиг, аюулт үзэгдэл, ослын мэдээ мэдээллийг хүлээн авах, дамжуулах, удирдлага зохицуулалтаар хангах

ГУРАВДУГААР БҮЛЭГ. ОНЦГОЙ БАЙДЛЫН ЕРӨНХИЙ ГАЗРЫН УДИРДЛАГА, БҮТЦИЙН НЭГЖИЙН ЧИГ ҮҮРЭГ

- 3.1. Онцгой байдлын ерөнхий газрын дарга
- 3.2. Тэргүүн дэд дарга бөгөөд штабын дарга
- 3.3. Дэд дарга
- 3.4. Дэд дарга
- 3.5. Улсын онцгой комиссын ажлын алба
- 3.6. Ажиллагааны удирдлагын газар
- 3.7. Гал түймэртэй тэмцэх газар
- 3.8. Холбоо, мэдээллийн технологийн газар
- 3.9. Улсын нөөцийн газар
- 3.10. Санхүү, ар талын газар
- 3.11. Эрсдэлийн удирдлагын газар
- 3.12. Бодлого төлөвлөлтийн газар
- 3.13. Захиргаа, эрхзүй, хүний нөөцийн газар
- 3.14. Гамшгаас хамгаалах сургалтын газар
- 3.15. Хяналт, шинжилгээ үнэлгээний газар
- 3.16. Агаараас эрэн хайх аврах ажиллагаа
- 3.17. Шуурхай удирдлагын ерөнхий зохицуулагч

ДӨРӨВДҮГЭЭР БҮЛЭГ. ХАРИУЦЛАГА**ХАВСРАЛТ.**

Хавсралт 1. Ажиллагаа зохион байгуулах дараалал

Хавсралт 2. Удирдлагын бүдүүвч

Хавсралт 3. Мэдээлэл солилцох бүдүүвч

Хавсралт 4. Хөдөлгөөнт удирдлагын байр

АЖИЛЛАГААНЫ УДИРДЛАГА, ЗОХИОН БАЙГУУЛАЛТЫН ЖУРАМ**НЭГДҮГЭЭР БҮЛЭГ
НИЙТЛЭГ ҮНДЭСЛЭЛ**

1.1. Улсын хэмжээнд тохиолдсон гамшиг, аюулт үзэгдэл, ослын үеийн ажиллагааны дарааллыг тогтоох, мэргэжлийн удирдлага зохицуулалтаар хангах, мэдээ, мэдээлэл солилцох, бүтцийн нэгжүүдийн чиг үүргийг хэрэгжүүлэх, харилцан ажиллагааг зохион байгуулахад энэхүү журмыг дагаж мөрдөнө.

1.2. Энэхүү журам нь Онцгой байдлын ерөнхий газар, харьяа салбар, нэгж, төв орон нутгийн онцгой байдлын байгууллагад хамаарна.

**ХОЁРДУГААР БҮЛЭГ
АЖИЛЛАГААНЫ УДИРДЛАГА, ЗОХИОН БАЙГУУЛАЛТ**

2.1. Гамшиг, аюулт үзэгдэл, ослын мэдээ мэдээллийг хүлээн авах, дамжуулах, удирдлага зохицуулалтаар хангах

2.1.1. Гамшиг ослын голомтод хүрэлцэн очсон аврах ажиллагааны удирдагч нөхцөл байдал, гамшиг ослын цар хүрээг үнэлж, мэдээллийг ШУЕЗ-д шуурхай дамжуулна.

2.1.2. ШУЕЗ нь ирүүлсэн мэдээлэлд үндэслэн холбогдох албан тушаалтанд мэдээлнэ.

2.1.3. Гамшиг, аюулт үзэгдэл, ослын мэдээллийг дараах дарааллын дагуу дамжуулна.

- ШУЕЗ нь Ажиллагааны удирдлагын газрын дарга, Гал түймэртэй тэмцэх газрын дарга, Тэргүүн дэд дарга, Онцгой байдлын ерөнхий газрын дарга, дэд дарга гэсэн дарааллаар мэдээллийг дамжуулна.

- Шуурхай удирдлагын оператор нь Ажиллагааны удирдлагын газар, Гал түймэртэй тэмцэх газрын хэлтсийн дарга нар, чиглэл хариуцсан алба хаагчдад

- Техникийн бэлэн байдал хариуцсан инженер нь шаардлагатай бүтцийн нэгжийн дарга нарт мэдээллийг тус тус дамжуулна.

2.1.4. Гамшигт нэрвэгдсэн болон амь насаа алдсан хүний тоо, хамарсан нутаг дэвсгэрийн хэмжээнээс хамаарч ажиллагааны удирдлагын дарааллыг Ажиллагааны удирдлагын газар, Гал түймэртэй тэмцэх газрын дарга тогтооно.

2.1.5. Орон нутаг, 2 хүртэлх аймаг, 2 дүүрэг, объектийн хэмжээний гамшиг, аюулт үзэгдэл, ослын үед аймаг орон нутгийн онцгой байдлын байгууллагын дарга, бүсийн төвийн захирагч удирдлага, зохицуулалтаар хангана.

2.1.6. Бүсийн хэмжээний болон 3-аас дээш аймаг, 3 дүүргийн нутаг дэвсгэрийг хамарсан, онц чухал объектод тохиолдсон гамшиг, аюулт үзэгдэл, ослын үед Ажиллагааны удирдлагын газрын дарга, Гал түймэртэй тэмцэх газрын дарга удирдлага, зохицуулалтаар хангана.

2.1.7. Улсын хэмжээний буюу 2-оос дээш бүс, нийслэл, улсын онц чухал объектод тохиолдсон гамшиг, аюулт үзэгдэл, ослын үед Онцгой байдлын ерөнхий газрын дарга, тэргүүн дэд дарга бөгөөд штабын дарга удирдлага, зохицуулалтаар хангана.

2.1.8. Гамшгийн зэрэглэлээс шалтгаалж шуурхай штаб байгуулан ажиллах чиглэлийг дараах дарааллын дагуу гаргана.

- Сум, дүүргийн шуурхай штабыг аймаг, нийслэлийн онцгой комиссын дарга;
- Аймгийн шуурхай штабыг бүсийн төвийн захирагч, аймгийн онцгой комиссын дарга, Онцгой байдлын ерөнхий газрын Ажиллагааны удирдлагын газрын дарга;
- Бүсийн хэмжээний шуурхай штабыг Онцгой байдлын ерөнхий газрын тэргүүн дэд дарга;
- Нийслэлийн шуурхай штабыг Онцгой байдлын ерөнхий газрын тэргүүн дэд дарга, нийслэлийн онцгой комиссын дарга;
- Улсын онцгой комиссын шуурхай штабыг Онцгой байдлын ерөнхий газрын дарга, Улсын онцгой комиссын дарга.

2.1.9. Бүх шатны шуурхай штаб нь “Онцгой комиссын шуурхай штабын ажиллах журам”-ыг баримталж ажиллана. **(Журам боловсруулагдаж, батлагдах шатанд явж байгаа болно)**

2.1.10. Онцгой байдлын ерөнхий газрын дарга, тэргүүн дэд дарга, Ажиллагааны удирдлагын газрын дарга, Гал түймэртэй тэмцэх газрын дарга нараас бусад нэгжийн дарга нар “яаралтай цуглар” дохиогоор ажлын байранд ирж, хариуцсан чиглэлийн дагуу үүрэг гүйцэтгэх бөгөөд зөвхөн Онцгой байдлын ерөнхий газрын даргын шийдвэрээр гамшиг, аюулт үзэгдэл, ослын голомтод очиж дэмжлэг үзүүлж ажиллана.

2.1.11. Шаардлагатай тохиолдолд гамшиг ослын голомтод хөдөлгөөнт удирдлагын байрыг байрлуулж ажиллана.

2.1.12. Хөдөлгөөнт удирдлагын байрны бэлтгэл бэлэн байдлыг Ажиллагааны удирдлагын газар, Гал түймэртэй тэмцэх газар, Холбоо, мэдээллийн технологийн газар, Санхүү, АТГ хариуцна.

2.1.13. Хөдөлгөөнт удирдлагын байранд шаардагдах техник, тоног төхөөрөмж, хэрэгсэлийн жагсаалтыг хавсралтад заасны дагуу бүрдүүлнэ.

ГУРАВДУГААР БҮЛЭГ ОНЦГОЙ БАЙДЛЫН ЕРӨНХИЙ ГАЗРЫН УДИРДЛАГА, БҮТЦИЙН НЭГЖИЙН ЧИГ ҮҮРЭГ

3.1. Онцгой байдлын ерөнхий газрын дарга:

3.1.1. Улсын хэмжээнд тохиолдсон гамшиг осол, аюулт үзэгдлийн үед ерөнхий удирдлага, үүрэг, чиглэлээр хангаж холбогдох шийдвэр гаргана;

3.1.2. Монгол Улсын шадар сайдад үүссэн нөхцөл байдал, авч хэрэгжүүлж байгаа арга хэмжээ, шийдвэрлүүлэх асуудлын талаар танилцуулна;

3.1.3. Улсын онцгой комисс, Засгийн газар, Үндэсний аюулгүй байдлын зөвлөлийг нөхцөл байдлын мэдээллээр хангана;

3.1.4. Шаардлагатай тохиолдолд Улсын онцгой комиссыг хуралдуулж, холбогдох шийдвэр гаргуулах;

3.1.5. Гамшгаас хамгаалах улсын албад, мэргэжлийн ангийн хүн, хүч хэрэгслийг татан оролцуулах санал танилцуулж шийдвэрлүүлэх;

3.1.6. Үндэсний аюулгүй байдлыг хангах тусгайлсан чиг үүргийн байгууллагуудыг татан оролцуулах;

3.1.7. Ажиллагааны удирдлагын газар, Гал түймэртэй тэмцэх газрын саналыг үндэслэн агаараас эрэн хайх, аврах, гал түймэр унтраах, гамшиг ослын бүсэд хүч хэрэгсэл хүргэх, нэрвэгдэгчийг татан авах ажиллагаанд нисдэг тэрэг ажиллуулах шийдвэр гаргана.

3.2. Тэргүүн дэд дарга бөгөөд штабын дарга:

3.2.1. Гамшиг, аюулт үзэгдэл, ослын талаар мэдээлэл авмагц Онцгой байдлын ерөнхий газрын даргад үүссэн нөхцөл байдал, авч хэрэгжүүлж байгаа арга хэмжээ, шийдвэрлүүлэх асуудлын талаар танилцуулах;

3.2.2. Шуурхай удирдлагаар хангах;

3.2.3. Шаардлагатай тохиолдолд Улсын онцгой комиссын шуурхай штабыг байгуулах саналыг танилцуулж, холбогдох шийдвэр гаргуулах;

3.2.4. Улсын онцгой комиссын шуурхай штабыг удирдлага зохион байгуулалтаар хангаж ажиллах;

3.2.5. Онцгой байдлын ерөнхий газрын даргын албан үүргийг түр орлох хугацаанд чиг үүргийг хэрэгжүүлэх;

3.2.6. Холбогдох бүтцийн нэгжийн дарга нарт үүрэг чиглэл өгч, удирдлагаар хангах;

3.2.7. Хил залгаа хөрш орнуудтай гамшиг, осол, гал түймрээс хамгаалах, хил орчмын нутаг дэвсгэрт тохиолдож болзошгүй гамшиг, осол, гал түймрээс урьдчилан сэргийлэх, тэмцэх асуудлаар хамтран ажиллах;

3.2.8. Гамшгийн үеийн хэрэгжүүлж буй арга хэмжээний явцыг хянах үйл ажиллагааг хэрэгжүүлнэ.

3.3. Дэд дарга /Сургалт, эрсдэл, урьдчилан сэргийлэх асуудал хариуцсан/:

3.3.1. Гамшиг, аюулт үзэгдэл, ослын талаар мэдээлэл авмагц ажлын байранд ирж хариуцсан бүтцийн нэгжийн бие бүрэлдэхүүнийг яаралтай цуглуулах, бэлэн байдлыг хангуулах, удирдлагаар хангаж ажиллах;

3.3.2. Гамшгийн ослын мэдээлэлд дүн шинжилгээ хийж, болзошгүй эрсдэлийг үнэлж шаардлагатай зөвлөмж боловсруулах, гамшгийн мэдээлэлд суурилсан төлөвлөлтийг хэрэгжүүлэх араг хэмжээг удирдлагаар хангах;

3.3.3. Гамшиг, аюулт үзэгдэл, ослын үүссэн нөхцөл байдал, урьдчилан сэргийлэх талаар хэвлэл мэдээллийн хэрэгслээр иргэд олон нийтэд мэдээлэл хүргэх, буруу ташаа мэдээлэл түгээхээс урьдчилан сэргийлэх, мэдээллийн цар хүрээ нийгэмд хэрхэн хүрч, үйлчилж байгаа талаар судалгаа, мониторинг хийх ажлыг удирдлагаар хангаж ажиллана.

3.3.4. Хөдөлгөөнт болон хөдөлгөөнт бус урьдчилан сэргийлэх, зарлан мэдээлэл хүргэх арга хэмжээг зохион байгуулах.

3.4. Дэд дарга /Санхүү, ар тал хангалт, улсын нөөц, холбоо хариуцсан/:

3.4.1. Гамшиг, аюулт үзэгдэл, ослын талаар мэдээлэл авмагц ажлын байранд ирж хариуцсан бүтцийн нэгжийн бие бүрэлдэхүүнийг яаралтай цуглуулах, бэлэн байдлыг хангуулах, удирдлагаар хангаж ажиллах;

3.4.2. Ар тал, хангалт, логистикийн үйл ажиллагааг төлөвлөх, зохион байгуулах, улсын нөөцөөс бараа, материал гаргах Засгийн газрын тогтоол, шийдвэрийн төслийг боловсруулан батлуулах, удирдлагыг мэдээллээр хангах үйл ажиллагааг удирдлагаар хангаж ажиллах;

3.4.3. Гамшгаас хамгаалах техник, тоног төхөөрөмж, багаж, хувцас хэрэглэлийг тогтоосон стандарт, норм нормативийн дагуу хангалтыг зохион байгуулах, шаардагдах хөрөнгийн асуудлыг шийдвэрлэхэд удирдлагад дэмжлэг үзүүлэх.

3.5. Улсын онцгой комиссын ажлын алба

3.5.1. Гамшгийн голомтод аврах, хор уршгийг арилгах, хойшлуулшгүй сэргээн босгох арга хэмжээнд оролцож байгаа байгууллага, аж ахуйн нэгжийн үйл ажиллагааг уялдуулан зохицуулах;

3.5.2. Нөхцөл байдалд өгсөн дүгнэлт, цаашид авч хэрэгжүүлэх арга хэмжээний тухай яам, агентлагийн саналыг нэгтгэн Улсын онцгой комисст танилцуулах, Улсын онцгой комиссын хурал зохион байгуулах, шийдвэр гаргуулах;

3.5.3. Мэргэжлийн байгууллага, шинжээчдээр гамшгийн цагийн байдлын үнэлгээ хийлгэх;

3.5.4. Засгийн газраас олгосон бараа, материал болон олон улс, хүмүүнлэгийн тусламжийг гамшгийн голомтод хүргэх, түгээх үйл ажиллагаанд хяналт тавих;

3.5.5. Улсын онцгой комиссоос авч хэрэгжүүлж байгаа арга хэмжээний талаар хэвлэл, мэдээллийн хэрэгслээр шуурхай мэдээлж байх.

3.6. Ажиллагааны удирдлагын газар

3.6.1. Гамшиг осол тохиолдсон, ШУЗМТ-өөс яаралтай цуглар дохио хүргэсэн үед нэгжийн дарга нөхцөл байдлыг үнэлж голомтод очих, ажлын байран дээр ирэх эсэх шийдвэр гаргаж, удирдлагад мэдэгдэнэ;

3.6.2. Нэгжийн бие бүрэлдэхүүнийг цуглуулж бэлэн байдлыг хангуулж, үүрэг чиглэл өгнө;

3.6.3. Засгийн газрын 2018 оны 327 дугаар тогтоолын дагуу улбар шар, улаан түвшний гамшгийн үед ажиллагааг удирдлага, зохицуулалт, мэргэжил арга зүйн зөвлөмжөөр хангах чиг үүргийг хэрэгжүүлэх;

3.6.4. Монгол Улсын гамшгаас хамгаалах төлөвлөгөө болон харилцан ажиллагааны төлөвлөгөөг тодотгох;

3.6.5. Нөхцөл байдлын мэдээллийг цуглуулж, нэгтгэн дүгнэж, дүн шинжилгээ хийж, ажиллагааны хувилбаруудыг боловсруулах;

3.6.6. Тухайн чиглэлийн мэргэжилтэнг газар орон дээр нь томилон ажиллуулах;

3.6.7. Гамшиг ослын голомтод ажиллаж буй алба хаагч ослын удирдлагыг хэрэгжүүлнэ, хэрэв дээд шатны албан тушаалтан ослын удирдлагыг албан ёсоор шилжүүлж аваагүй тохиолдолд зөвхөн хэрэгжүүлэх арга хэмжээний хувилбар, санал гаргана;

3.6.8. Шаардагдах нөөц, хүч хэрэгслийг татан оролцуулах шийдвэр гаргах;

3.6.9. Эрэн хайх, аврах ажиллагаанд нисдэг тэрэг оролцуулах хүсэлт ирүүлсэн тохиолдолд ажиллагааны бүсийн цаг агаар, газар орны нөхцөл, үр дүнг тооцож, онцгой байдлын ерөнхий газрын даргад санал танилцуулах;

3.6.10. Эрэн хайх, аврах ажиллагааны агаарын хөлгийн нислэгийг шууд удирдлагаар хангах;

3.6.11. Шаардлагатай тохиолдолд Улсын онцгой комиссын Шуурхай штаб байгуулж ажиллуулах саналыг Улсын онцгой комиссын ажлын албанд хүргүүлнэ;

3.6.12. Улсын онцгой комиссын Шуурхай штабыг удирдлага зохицуулалтаар хангаж ажиллах;

3.6.13. Шуурхай ажиллагааны хөдөлгөөнт удирдлагын байрны бэлэн байдлыг хангуулж ажиллагаанд оролцуулах.

3.7. Гал түймэртэй тэмцэх газар

3.7.1. Гамшиг осол тохиолдсон, ШУЗМТ-өөс яаралтай цуглар дохио хүргэсэн үед нэгжийн дарга нөхцөл байдлыг үнэлж голомтод очих, ажлын байран дээр ирэх эсэх шийдвэр гаргаж, удирдлагад мэдэгдэнэ;

3.7.2. Нэгжийн бие бүрэлдэхүүнийг цуглуулж бэлэн байдлыг хангуулж, үүрэг чиглэл өгнө;

3.7.3. Бүс, орон нутгийн нөөц боломжоос давсан объектын болон ой хээрийн гал түймрийн үед удирдлага, зохицуулалтаар хангах чиг үүргийг хэрэгжүүлэх;

3.7.4. Улсын онц чухал болон галын аюултай, тэсэрч дэлбэрэх объект, онцгой төвөгшилтэй барилга байгууламж, 2-оос дээш гал түймэр унтраах анги ажиллаж байгаа гал түймэр, ой, хээрийн гал түймрийн нөхцөл байдал хүндэрсэн үед

голомтод Онцгой байдлын ерөнхий газрын Гал түймэртэй тэмцэх нэгжийн удирдах албан тушаалтан, хариуцсан мэргэжилтнийг томилж ажиллуулна;

3.7.5. Гал түймрийн голомтод гал унтраах удирдагчийг томилон ажиллуулах, удирдлагыг авсан, өгснийг мэдэгдсэнээр унтраах удирдагчийн үүрэг шилжсэнд тооцох;

3.7.6. Хил орчмын бүс нутаг болон автомашин, морь, явганаар очих боломжгүй орон нутгаас алслагдсан, хөвч тайгад гарсан ой, хээрийн гал түймэр унтраах ажиллагаанд бүлгийг шуурхай хүргэх зорилгоор Онцгой байдлын байгууллагын нисдэг тэргийг оролцуулах талаар Онцгой байдлын ерөнхий газрын даргад санал уламжилж, шийдвэрлүүлэх. Шаардлагатай тохиолдолд Зэвсэгт хүчний нисдэг тэргийг дайчлах санал, хүсэлтийг Онцгой байдлын ерөнхий газрын даргаар уламжлуулан Зэвсэгт хүчний жанжин штабт хүргүүлж, шийдвэрлүүлэх;

3.7.7. Гал түймэр унтраах ажиллагаанд бусад мэргэжлийн анги, албад, сайн дурын хэсэг, аж ахуй нэгжийн техник хэрэгсэл, бусад шаардлагатай хүч хэрэгслийг татан оролцуулах;

3.7.8. Томоохон хэмжээний гал түймэр унтраах ажиллагаанд УБТЗХНН-ийн Цэрэгжүүлсэн Онцгой байдлын албаны ус тээвэрлэх, шахах зориулалт бүхий вагоныг татан оролцуулах.

3.8. Холбоо, мэдээллийн технологийн газар:

3.8.1. Гамшиг осол тохиолдсон, ШУЗМТ-өөс яаралтай цуглар дохио хүргэсэн үед нэгжийн дарга ажлын байран дээр ирж нэгжийн бие бүрэлдэхүүнийн цуглуулж бэлэн байдлыг хангуулна;

3.8.2. Гамшиг, аюулт үзэгдэл, ослын нөхцөл байдлыг үнэлэн гамшгийн голомтод холбоо зохион байгуулах төлөвлөлтийг боловсруулах, холбооны хүч хэрэгслийг тодотгох, дайчлах, хуваарилах үйл ажиллагааны хэрэгжилтийг хангуулна;

3.8.3. Гамшиг, ослын үед холбоо, зарлан мэдээлэл, мэдээллийн технологийн бүхий л төрлийн сувгийг ашиглах, тусгай хэрэглээний сүлжээгээр удирдлагын болон харилцан ажиллагааны холбоог зохион байгуулах, хянаж удирдах;

3.8.4. Шуурхай ажиллагааны үед ослын голомтод ажиллах холбоочинг томилж, шаардлагатай холбооны техник хэрэгсэл, тоног төхөөрөмжөөр хангаж, хяналт тавина;

3.8.5. Холбоочинг анги, салбарын байрлалаас гарснаас хойш 2 цаг тутам, шаардлагатай тохиолдолд тухай бүр холбоонд орох, ослын голомтод штаб байгуулагдсан тохиолдолд байнгын бусад тохиолдол тогтоосон цагаар холбоонд ороход хяналт тавина. Энэ тохиолдолд төв, орон нутгийн радио холбооны суурин зангилаа байнгын хүлээн авалтад байна;

3.8.6. Холбооны хүч хэрэгслийн бэлэн байдал, хүрэлцээ, харилцан ажиллах байгууллагуудын холбооны системийн нөхцөл байдал, үйл ажиллагаа явуулж буй бүс нутаг дахь холбооны сүлжээний байдал, газар орны онцлог, холбооны системийг дэлгэх хугацаа, гамшиг, аюулт үзэгдлийн нөлөөллийг тооцож, холбоог зохион байгуулахад мэргэжлийн дэмжлэг үзүүлнэ;

3.8.7. Цагийн байдлын өөрчлөлтийн дагуу холбооны систем (радио, үүрэн, сансрын холбоо болон сүлжээ үүсгэх төхөөрөмжүүд)-ийг богино хугацаанд тогтоогдсон хүрээнд өөрчлөн байгуулж, удирдагдах боломжийг бүрдүүлнэ;

3.8.8. Үндэсний аюулгүй байдлыг хангах тусгайлсан чиг үүрэг бүхий байгууллагуудтай “Чиглэлийн төлөвлөгөө”-нд тусгагдсаны дагуу холбоог зохион байгуулна;

3.8.9. Шуурхай ажиллагааны үед “Онцгой байдлын байгууллагын радио холбоо зохион байгуулах журам”, “Гамшиг, аюулт үзэгдэл, ослын голомтод радио холбоо зохион байгуулах заавар”-т тусгагдсаны дагуу удирдлагын болон бүлгийн холбоог зохион байгуулна;

3.8.10. Агаарын замаар хөдөлгөөн үйлдэж буй нисэх нэгж болон суурин удирдлагын төв хооронд харилцаа холбооны сүлжээ (радио, үүрэн болон сансрын холбоо)-г ашиглаж, мэдээ мэдээллийг тухай бүр солилцоход хяналт тавина;

3.8.11. Ажиллагааны үед 2.1-2.17-д заасан албан тушаалтнууд удирдлагын холбоог хангах зориулалт бүхий радио станцтай байх бөгөөд нөхцөл байдлын мэдээллийг тасралтгүй хүлээн авч, шуурхай арга хэмжээ авах нөхцөлийг бүрдүүлнэ;

3.8.12. Холбооны хөдөлгөөнт удирдлагын төвийн холбоо, мэдээллийн технологийн техник хэрэгсэл, сүлжээний бэлэн байдлыг хангуулж, ажиллагаанд оролцуулна;

3.8.13. Ажиллагааны үед холбоо, мэдээллийн технологийн сүлжээ, кибер аюулгүй байдлыг хангах, халдлагаас урьдчилан сэргийлэх арга хэмжээг авч хэрэгжүүлэх;

3.8.14. Холбоо, мэдээллийн технологийн техник хэрэгсэл, сүлжээнд доголдол гарсан тохиолдолд шуурхай засварлах, хариу арга хэмжээг авна;

3.8.15. Онцгой байдлын ерөнхий газрын удирдлагаас өгсөн бусад үүргийг хэрэгжүүлнэ.

3.9. Улсын нөөцийн газар:

3.9.1. Гамшиг осол тохиолдсон, ШУЗМТ-өөс яаралтай цуглар дохио хүргэсэн үед нэгжийн дарга ажлын байран дээр ирж бие бүрэлдэхүүнийг цуглуулж бэлэн байдлыг хангуулах;

3.9.2. Улсын нөөцийн анги салбаруудыг бэлэн байдалд шилжүүлж, бие бүрэлдэхүүнийг ажлын байранд дээр нь цуглуулах;

3.9.3. Засгийн газар, Улсын онцгой комиссоос гарсан шийдвэрийн хэрэгжилтийг хангаж, хоол хүнс, хувцас хэрэгсэл, шаардлагатай бараа материалаар хангах ажлыг зохион байгуулах;

3.9.4. Олон улсын хүмүүнлэгийн тусламжийн үйл ажиллагааг зохицуулалт, дэмжлэгээр хангах;

3.9.5. Онцгой байдлын ерөнхий газрын удирдлагаас өгсөн бусад үүргийг хэрэгжүүлнэ.

3.10. Санхүү, ар талын газар:

3.10.1. Гамшиг осол тохиолдсон, ШУЗМТ-өөс яаралтай цуглар дохио хүргэсэн үед нэгжийн дарга ажлын байран дээр ирж нэгжийн бие бүрэлдэхүүнийг цуглуулж, бэлэн байдлыг хангуулах;

3.10.2. Гамшиг, аюулт үзэгдэл, ослын үед шуурхай удирдлага зохицуулалтын арга хэмжээг авч хэрэгжүүлэхэд шаардагдах бүх төрлийн хангалтыг зохион байгуулах, шаардагдах хөрөнгийн асуудлыг шийдвэрлэхэд удирдлагад дэмжлэг үзүүлэх;

3.10.3. Онцгой байдлын ерөнхий газрын удирдлагаас өгсөн бусад үүргийг хэрэгжүүлнэ.

3.11. Эрсдэлийн удирдлагын газар:

3.11.1. Гамшигийн ослын мэдээлэлд дүн шинжилгээ хийж, болзошгүй эрсдлийг үнэлж шаардлагатай зөвлөмж боловсруулан хүргүүлэх;

3.11.2. Гамшиг, аюулт үзэгдэл, ослын үүссэн нөхцөл байдлын талаар хэвлэл мэдээллийн хэрэгслээр ярилцлага, тайлбар өгөх, мэдээлэх, ташаа мэдээлэл түгээхээс сэргийлэх;

3.11.3. Иргэдэд гамшиг, аюулт үзэгдэл, осолоос урьдчилан сэргийлэх мэдээллийг хэвлэл мэдээлэл, сурталчилгааны бүх төрлийн сувгаар шуурхай түгээх

3.11.4. Гамшгаас урьдчилан сэргийлэх чиглэлээр олон нийтэд хүргэж буй мэдээллийн цар хүрээ нийгэмд хэрхэн хүрч, үйлчилж байгаа талаар судалгаа, мониторинг хийх ажлыг зохион байгуулах;

3.12. Бодлого төлөвлөлтийн газар

3.12.1. Олон улсын эрэн хайх, аврах баг хүлээн авах үйл ажиллагааг зохицуулалтаар хангаж, ажиллагааны турш дэмжлэг үзүүлж ажиллах;

3.12.2. Онцгой байдлын ерөнхий газрын удирдлагаас өгсөн бусад үүргийг хэрэгжүүлнэ.

3.13. Захиргаа, эрх зүй, хүний нөөцийн газар

3.13.1. Онцгой байдлын ерөнхий газрын даргаас гарсан шийдвэрүүдийг албажуулах, эрх зүйн заавар зөвлөмжөөр хангах;

3.13.2. Үүрэг гүйцэтгэж буй алба хаагчдад эрүүл мэнд, сэтгэлзүйн яаралтай тусламж үйлчилгээ үзүүлэх;

3.13.3. Онцгой байдлын ерөнхий газрын удирдлагаас өгсөн бусад үүргийг хэрэгжүүлнэ.

3.14. Гамшгаас хамгаалах сургалтын газар

3.14.1. Хөдөлмөрийн аюулгүй ажиллагааны дүрэм, журам, зааврын хэрэгжилтийг хангуулах, хяналт тавих;

3.14.2. Онцгой байдлын ерөнхий газрын удирдлагаас өгсөн бусад үүргийг хэрэгжүүлнэ.

3.15. Хяналт шинжилгээ үнэлгээний газар

3.15.1. Гамшгийн үеийн хэрэгжүүлж буй арга хэмжээний явцыг хянах, дүн шинжилгээ хийх, зөвлөмж гаргах;

3.15.2. Онцгой байдлын ерөнхий газрын удирдлагаас өгсөн бусад үүргийг хэрэгжүүлнэ.

3.16. Агаараас эрэн хайх аврах ажиллагаа

3.16.1. Нисэх бүрэлдэхүүн нисдэг тэрэгний бэлтгэл, бэлэн байдлыг хангах;

3.16.2. Агаараас эрэн хайх, аврах ажиллагаанд нисдэг тэрэг оролцуулах хүсэлтийг үндэслэн Ажиллагааны удирдлагын газрын дарга Онцгой байдлын ерөнхий газрын даргад санал танилцуулна;

3.16.3. Нислэгийн удирдамжийг Ажиллагааны удирдлагын газраас урьдчилан бэлтгэж Шуурхай удирдлага, зарлан мэдээлэх төв, 119 дүгээр анги дээр байршуулсан байна;

3.16.4. Нисдэг тэргийг эрэн хайх, аврах ажиллагаанд ажиллуулах шийдвэр гарч, нисдэг тэрэг хөөрснөөс, буух хүртэлх үйл ажиллагааг Ажиллагааны удирдлагын газрын агаараас эрэн хайх, аврах ажиллагаа хариуцсан ахлах мэргэжилтэн удирдлага зохицуулалтаар хангана;

3.16.5. Нисэх бүрэлдэхүүн, эрэн хайх ажиллагаанд оролцож буй алба хаагчдын хөдөлмөр хамгаалал, аюулгүй ажиллагаа, эрүүл мэндийн зааварчилгааг мөрдүүлж ажиллуулах;

3.16.6. Нислэгийн үйл ажиллагаанд Улсын нисэхийн тухай хууль, түүнтэй нийцүүлж баталсан эрх зүйн акт, эзэмшиж буй агаарын хөлгийн үйлдвэрлэгчээс гаргасан дүрэм, зааврыг мөрдөх;

3.16.7. Ой хээрийн түймрийн үед агаараас тандалт хийх нислэгт Гал түймэртэй тэмцэх асуудал хариуцсан мэргэжилтэнг оролцуулна.

3.17. Шуурхай удирдлагын ерөнхий зохицуулагч

3.17.1. Гамшиг, аюулт үзэгдэл, ослын мэдээ, мэдээллийг “Мэдээлэл шуурхай удирдлагын төв” болон “Бүсийн төв”, анги, салбар нэгжээс хүлээн авах;

3.17.2. Нөхцөл байдлыг үнэлэх;

3.17.3. Шуурхай удирдлага, зохицуулалтаар хангах;

3.17.4. Тасаг, бүлэгт холбоочин томилох, тасралтгүй холбоо зохион байгуулах үүрэг чиглэл өгөх;

3.17.5. Хөдөлмөрийн аюулгүй байдал, эрүүл ахуйн дүрэм, Замын хөдөлгөөний дүрмийг баримтлах үүрэг чиглэл өгөх;

3.17.6. Дуудлагаар томилгоот ээлжийн бүрэлдэхүүнийг гаргах;

3.17.7. Ажиллагааны удирдлага, зохицуулалтын хэлтсийн дарга, Гал түймэр унтраах хэлтсийн даргад мэдээлэл өгөх, удирдлагаас өгсөн үүргийг холбогдох албан тушаалтанд мэдэгдэх;

3.17.8. Голомтод эхний дуудлага, мэдээллээр очсон томилгоот ээлжийн бүрэлдэхүүнээс үүссэн нөхцөл байдлыг тодорхойлж, бодит мэдээлэл авах/цуглуулах;

3.17.9. Үүссэн нөхцөл байдлын талаар “МШУТ-ийн Ахлах зохицуулагч”, “Бүсийн төвийн Шуурхай удирдлагын зохицуулагч”, аймаг, нийслэлийн Онцгой байдлын газар, хэлтсийн дарга нараас тодотгох;

3.17.10. Төв, орон нутгийн Онцгой байдлын газар, хэлтсийн даргад шийдвэр гаргахад дэмжлэг үзүүлэх, үүрэг чиглэлээр хангах;

3.17.11. Хүч нэмэгдүүлэн ажиллах анги, салбар, бүлгийг гаргах саналыг танилцуулах;

3.17.12. Ажиллагааны болон Гал түймэртэй тэмцэх асуудал хариуцсан бүтцийн нэгжийн дарга, Шуурхай удирдлага, зарлан мэдээллийн төв 119 дүгээр ангийн захирагчид танилцуулах;

3.17.13. Онцгой байдлын ерөнхий газрын удирдлага буюу Онцгой байдлын ерөнхий газрын дарга, Тэргүүн дэд дарга бөгөөд Штабын даргад танилцуулах;

3.17.14. Гамшиг, аюул, ослын нөхцөл байдал, төрөл, цар хүрээг харгалзах, Улсын хэмжээнд болон хоёроос дээш аймгуудыг хамарсан үед Ажиллагааны болон Гал түймэртэй тэмцэх асуудал хариуцсан бүтцийн нэгжид удирдлага, зохицуулалтыг шилжүүлж, удирдлагаас өгсөн үүргийг холбогдох албан тушаалтанд мэдэгдэх;

3.17.15. Нөхцөл байдлыг үнэлэн ОББ-ын салбар нэгж, төв, орон нутгийн Гамшгаас хамгаалах алба, Мэргэжлийн ангийн хүч хэрэгслийг тодотгох, шийдвэр гаргахад дэмжлэг үзүүлэх;

3.17.16. Хил орчмын болон хил дамнасан гамшиг, аюулт үзэгдэл, ослын мэдээ мэдээллийг “Шуурхай ажиллагааг зохион байгуулах журам”-ын 14 дүгээр хавсралтыг удирдлага болгох. /Гадаад хамтын ажиллагааны хэлтсээр дамжуулах/;

3.17.17. Томоохон аюулт үзэгдэл, ослын нөхцөл байдал, хэрэгжүүлж буй арга хэмжээний талаар Үндэсний аюулгүй байдлын зөвлөлийн Шуурхай удирдлагын нэгдсэн төв, Засгийн газрын Шуурхай жижүүр, Хил хамгаалах ерөнхий газар, Тагнуулын ерөнхий газар, Цагдаагийн ерөнхий газар, Эрүүл мэндийн байгууллага, Мал эмнэлгийн ерөнхий газар, Одон орон геофизикийн хүрээлэн, Цаг уур, орчны шинжилгээний газартай тогтоосон цагт болон тухай бүр мэдээ мэдээлэл хүлээн

авах, дамжуулах, бүх шатны шуурхай штабтай мэдээлэл солилцох, холбооны бэлэн байдлыг хангуулах, шалгах;

3.17.18. Ажиллагааны үр дүнг хянах, дүгнэх;

3.17.19. Томоохон аюулт үзэгдэл, ослын нөхцөл байдлын талаарх мэдээлэл, хэрэгжүүлсэн арга хэмжээг “Гамшгийн нөхцөл байдлын хоногийн мэдээ”-нд бүрэн тусгаж, цахим системд оруулах.

ДӨРӨВДҮГЭЭР БҮЛЭГ ХАРИУЦЛАГА

4.1. Тухайн гамшиг, ослын ажиллагааг удирдаж буй албан тушаалтны буруу шийдвэр, үйлдлээс шалтгаалж хүний амь нас, эд хөрөнгөд хохирол учирсан тохиолдолд шийдвэр гаргасан албан тушаалтан хариуцлага хүлээнэ.

4.2. Ажлын байрны тодорхойлолт болон журамд заасан чиг үүргээ биелүүлээгүйн улмаас ажиллагаа үр дүнгүй болох, хүний амь нас эд хөрөнгөд хохирол учирсан тохиолдолд хариуцсан алба хаагч хариуцлага хүлээнэ.

4.3. Буруу шийдвэр гаргасан болон хариуцлага хүлээлгэх эсэхийг хууль хяналтын байгууллага тогтооно.

--oOo--